

# Powšitkowne WOZJEWJENJA

njedźelu, 5. awgusta 2012

## **Klášterski swjedzeń pola Budyskich klarisow**

Składnostnje 800. róčnicy založenja rjadu klarisow přeprašuja rjadniske sotry sobotu, 11. awgusta, na swjedzeń do Budyskeho klášterka. W 10 hodź. budže swjatočna Boža mša, kotruž změje diecezanski administrator Michael Bautz. Modlenju Jandželknjeza w 12 hodź. přizamknje so rozmyslowanje z patrom Ubaldom Hausdorffom OFM wo nowej ikonje swjateje Klary. Wot 12.45 do 15.00 hodź. su wšelake poskitki za wulkich a małych přihotowane. Swačini a bjesadže w 15 hodź. scěhuje w 16 hodź. zakončacy nyšpor.

## **Putniska jězba do Fatimy a Santiago de Compostela**

Wot pónđzele do pónđzele, 10. do 17. septembra, wotměje so putniska jězba do Fatimy a Santiago de Compostela (z lětađlom a busom). Někotre městna za tute putnikowanje su hišće swobodne, tak zo móža so zajimcy hišće hač do srjedy, 15. awgusta, přizjewić. Dalše informacije poda a přizjewjenja přijimuje Matthias Hadank z Hórkow, Sydlišćowy puč 2, telefonowe čisło (03 57 96) 9 40 37.

## **Wujednać so, hdyž maš chorość a smjerć před wočoma;**

Ambulantna hospicna služba Carity přeprašuje wšitkich zajimcow na přednošk k temje „... a potom so zaso znjesemy?“ – wo wujednanju, hdyž maš chorość a smjerć před wočomaj – pónđzelu, 3. septembra, we 18 hodź. w ewangelskej wosadnicy na Angeru/Połčničanskej dróze w Kamjencu. Přednošować budže něhdyša dušepastyrka w Kamjenskej chorowni swjateho Jana, Anne Kruse.

## **Serbske zynki w Drježdźanskej cyrkwi Našeje knjenje**

We wuznamnej Drježdźanskej cyrkwi Našeje knjenje zaklinčitej njedźelu, 19. awgusta, serbskej twórbje. Wšitcy su wutrobnje do sakskeje stolicy přeprašeni, zo bychu serbske zynki na tutym wurjadnym městnje slyšeli.

Chór Serbskeho ludoweho ansambla (SLA) pod nawodom Gabriela Doná zanjese na Božej službje w 11 hodź. Jana Bulankowu Missu sorabicy. Popołdnu w 15 hodź. předstaja so w rjedže duchowneje njedźelskeje hudźby wurězki z najrjeńšeho serbskeho oratorija – oratorija „Nalěčo“ wot Handrija Zejlerja a Korle Awgusta Kocora. Tute zanjese spěwarki a spěwarjo z chórow Bratrowstwa, Budyšina, Lipy, Meje a SLA kaž tež solisća Susanne Thielemann, Tanja Donatec, André Khamasmie a Jörg Hempel, přewodženi wot orchestra Sinfonietta z Drježdžan. Cyłkowny wuměłski nawod změje Judit Kubicec. Farar cyrkwyje Našeje knjenje Holger Treutmann porěči duchowne słowo k njedźeli.

Zastupne lisćiki za popołniši koncert móža sej zajimcy najpozdžišo hač do pjatka, 10. awgusta, w SLA w Budyšinje skazać, telefonowe čisło (0 35 91) 35 81 07. Dalša móžnosć wobsteji na internetowej stronje [www.frauenkirche-dresden.de/tickets-anrechte.html](http://www.frauenkirche-dresden.de/tickets-anrechte.html).